


古微書


三之五



漢書門類			
八	四	三	號
一	二	函	架
冊			

八	四	三
一	二	函
冊		

內閣文庫	
番號	漢 8473
冊數	12 ( 2 )
函號	277 239





古微書卷之三

明華容孫穀著錄

尚書帝命驗

賁居子曰帝王之興自有命運五德終始錄圖更承皆先  
革之于天象錯之以地文是故皇帝王伯春夏秋冬望氣  
前知占瑞逆見未有運世無本而得崛起在位矣河不圖  
鳳不至孔子以不王而命驗鍾漢此圖緯之書所以著于  
刪後與不然緯耳讖耳以何重之云

則稱昊天自上監下則稱上天據遠視之蒼蒼然則稱蒼天  
按說文云天顛也



劉熙釋名云天顯也又云坦也

白虎通天之爲言鎮也居高理下爲人鎮也

楊泉物理論天者旋也均也積陽純剛其體廻旋羣生之所大仰

太元經九天一中天二羨天三從一作順天四更天五晬天六

廓天七咸天八沈天九咸天

天宗日月北辰地宗岱河海也日月爲陰陽宗北辰爲星宗河爲水宗海爲澤宗岱爲山宗

按尚書歐陽及大小夏侯說尚書皆云所祭者六上不謂天下不謂地旁不謂四方在六者之間助陰陽變化實一而名六宗矣孔光劉歆以六宗謂乾坤六子水火雷風山澤也賈

逵以爲六宗者天宗三日月星辰地宗三河海岱也馬融云萬物非天不覆非地不載非春不生非夏不長非秋不收非冬不藏此其謂六也劉歆孔晁以爲乾坤之六子爲六宗王肅用家語之文以爲四時也寒暑也日也月也星也水旱也爲六宗許君謹按與古尚書同鄭駁之云旣六宗云禋下山川言望則六宗無山川明矣大宗伯云以禋祀祀昊天上帝以實柴祀日月星辰以禋燎祀司中司命風師雨師又祭義曰郊之祭大報天而主日配以月則郊天並祭日月可知其餘星也辰也司中也司命也風師也雨師也此之謂六宗亦明矣星謂五緯也辰謂日月所會十二次司中司命文昌第五第四星也風師箕也雨師畢也晉張髦云臣謂禋于六宗

祀祖考所尊者六三昭三穆是也又劉昭作六宗辨繁故不錄

帝者天號也王者人稱也天有五帝以立名人有三王以正度天子爵稱也皇者煌煌也


按乾坤鑿度曰孔子曰易有君人五號也帝者天稱也王者美行也天子者爵號也大君者與上行異也大人者聖明德備也變文以著名題德以別操

帝者承天立五府以尊天重象也五府五帝之廟蒼曰靈府赤曰文祖黃曰神斗白曰顯紀黑曰立矩唐虞謂之五府夏謂之世室殷謂之重屋周謂之明堂皆祀五帝之所也

宋均注云象五精之神也天有五帝集居太微降精以生聖

人故帝者承天立帝之府是為天府文祖者赤帝赤燦怒之府名曰文祖火精光明文章之祖故謂之文祖周曰明堂神斗者黃帝含樞紐之府名曰神斗斗主也土精澄靜四行之主故謂之神斗周曰太室顯紀者白帝白招拒之府名曰顯紀紀法也金精斷割萬物故謂之顯紀周曰總章立矩者黑帝汁光紀之府名曰立矩矩法也水精立昧能權輕重故謂之立矩周曰立堂靈府者蒼帝靈威仰之府名曰靈府周曰青陽

按禮大傳王者禘其祖之所自出鄭注曰王者之先祖皆感太微五帝之精以生蒼則靈威仰赤則赤燦怒黃則含樞紐白則白招拒黑則汁光紀皆用正



歲之正月郊祭之蓋特尊焉祭法有虞氏禘黃帝而郊嚳祖顓頊而宗堯夏后氏亦禘黃帝而郊鯀祖顓頊而宗禹殷人禘嚳而郊冥祖契而宗湯周人禘嚳而郊稷祖文王而宗武王

鄭注祭上帝于南郊曰郊祭五帝五神于明堂曰祖宗

明堂月令春曰其帝太昊其神勾芒夏曰其帝炎帝其神祝融中央曰其帝黃帝其神后土秋曰其帝少昊其神蓐收冬曰其帝顓頊其神玄冥有虞氏以上尚德禘郊祖宗配用有德者而已自夏以下稍用其姓氏先後之次有虞氏夏后氏宜郊顓頊殷人宜郊契郊祭一帝而明堂祭五帝小德配寡大德配衆亦禮之殺也

堯夢長人見而論治舉舜于服澤之陽

虞舜聖在側陋光曜顯都握石椎懷神珠

椎讀曰錘錘平輕重也握謂知玉衡之道

懷神珠喻有聖性也

順堯考德題期立象

注云堯巡省于河洛得龜龍之圖書舜禪後習堯禮得之演以

為考河命題五帝之期立將起之象凡三篇在中候也

姚氏縱華感樞

注云縱生也舜母握登感樞星之精而生舜重華

舜受終赤鳳來儀

按路史帝堯碑云其先出于塊隗翼火之精有神龍首出于常羊慶都交之生伊堯不與凡等龍顏日角眉八彩謨自侯伯游于玄河龍龜負銜投鈴授與然後授命又堯母碑云三士為堯讓也惟士能讓即為優饒後下加乃人字象引乞之

按尸子云舜兩瞳子是謂重明作事成法出言成章夫舜蓄也蔓地蓮華之名有睽曜意故目好動而曰舜或作瞬

公孫尼子云舜牧羊于潢陽堯舉之以為天子

干寶云舜耕歷山獲玉歷于河際之巖知天命之在己體道不倦

墨子云堯教化及雕題蜀越撫交趾身涉流沙地封獨山西見王母訓及大夏渠收北中幽都及狗國與人身而鳥面及焦僥


尸子云虞舜灰于常羊什器于壽邱就時負夏未嘗暫息頓邱買貴于是販于頓邱傳虛賣賤于是債于傳虛以均救之類林云叟填井後兩目方瞽又云舜耕歷山歲不熟舜糶其

母與糶每還錢與米問之子也因相見泣拭其父目尋自明堯聞而妻之貞源亦云糶于平陽市父認之乃舐其目目以光明

又呂氏春秋曰堯以天下讓舜鯀為諸侯怒于堯曰得天之道者為帝得地之道者為三公今我得地之道而不以我為三公以堯為失論欲得三公乃使猛獸欲以為亂比獸之角能以為城舉其尾能以為旌召之不來彷徨于野以患帝舜于是殛之于羽山副之以吳刀禹不敢怨而反事之官為司空

禹白帝精以星感修己一作紀山行見流星貫昴意感栗然生妣

戎文命禹注云金星精也栗然威貌妣禹氏禹生戎地名文命也



禹身長九尺有只虎鼻河目駢齒鳥喙耳三漏戴成鈴裹玉斗

靈準聽云有人出石夷握地代戴成鈴懷玉斗姚氏注云禹胸有黑文如北斗鄭云謂懷璇璣玉衡之道戴鈴謂有骨表如鈎也鈴星玉鼯履已世紀云首戴鈴虎鼻大口足文履已

按吳越春秋鯀娶于有莘氏之女名曰女嬉年壯未孳嬉于

砥山得薏苡而吞之意若為人所感因而妊孕剖脇而產高

密家于西羌地曰石紐石紐在蜀西川也

水經注禹生于蜀之廣柔縣石紐村今之石泉縣也

路史初鯀納有莘氏曰志是為修己年壯不字獲若后于石

紐服媚之而遂孕歲有二月以六月六日屠鬴而生禹于夔

道之石紐鄉所謂剗兒坪者蜀本紀作痢兒畔夷人共營其

地方百里不敢處及畜牧有罪者逃之捕者不逼三年則原

之畏禹之神亦猶窮山不敢西射畏軒轅之邱也

真仙通鑑夏禹治水隨山濬川老君遣雲華夫人往陰相之

時禹駐巫山之下大風卒至崖谷振隕力不可制忽遇雲華

夫人禹拜而求助夫人即敕侍女授禹策召鬼神之書因命

其神狂章虞余黃麾大翳庚辰童律巨靈神等助其斬石疏

波決塞道阨禹常謁雲華于崇獻之巔顧盼之際化而為石

倏然飛騰散為輕雲油然而止聚為夕雨或為游龍或為翔

鶴千態萬狀不可親也

十洲記昔禹治洪水既畢乃乘躡車度弱水而到鍾山祠上

帝于北阿歸大功于九天

又吳越春秋禹三十未娶行到塗山恐時之暮失其度制乃

辭云吾娶也必有應矣乃有白狐九尾造于禹禹曰白者吾之服也其九尾者王之證也塗山之歌曰綏綏白狐九尾癩癩我家嘉夷來賓為王成家成室我造彼昌天人之際于茲則行明矣哉禹因娶塗山謂之女嬌取辛壬癸甲禹行十月女嬌生子啟啟生不見父晝夕呱呱啼泣禹崩之後眾瑞竝去天美禹德而勞其功使百鳥還為民田大小有差進退有行一盛一衰往來有常

桀無道殺關龍逢絕滅皇圖壞亂歷紀皇天也紀綱紀也天之圖歷龍逢引以諫桀也

殘賊天下賢人逃遁避時也淫色慢易男女無別不事祖宗 桀失其

玉鏡用其噬虎注云玉鏡喻清明之道噬虎喻暴虐也

按太公金匱桀怒湯以諛臣趙梁計召而囚之均臺置之種

泉嫌于死湯乃行賂桀遂釋之而賞之贊茅 夏桀之時有

岑山之水桀常以十月發民鑿山穿林通于河民諫曰孟冬

鑿山穿林是泄天氣發地之藏天子失道後必敗桀殺之期

年岑山崩為大澤湯率諸侯伐之

太任生子昌時季秋之月甲子有赤爵銜丹書入于豐止于昌

戶其書云敬勝怠者吉怠勝敬者滅義勝欲者從欲勝義者凶

凡事不強則枉不敬則不正枉者廢滅敬者萬世以仁得之以

仁守之其量百世以不仁得之以仁守之其量十世以不仁得

之以不仁守之不及其世

按宋書志初黃帝之世讖言曰西北為王期在甲子昌制命

發行誅且行道及公劉之後十三世而生季歷季歷之十年



飛龍盈于殷之牧野此蓋聖人在下位將起之符也季歷之妃曰太任夢長人感已浚于豕牢而生昌是為周文王龍顏

虎肩身長十尺胸有四乳太王曰吾世當有興者其在昌乎

季秋之月甲子赤爵銜丹書入艷止昌戶昌拜稽首至于磻溪

之水呂尚釣涯王下趨拜曰望公七年乃今見光景于斯答曰

望釣得玉璜半璧曰璜釣得魚中有璜刻曰姬受命呂佐旌受天命為天子呂佐旌理之也

遂置車左王躬執驅下賢也車尊曰左號曰師尚父

按帝王世紀文王之妃曰太妣夢商庭生棘太子發植梓樹

于闕間化為松柏柞棫覺而驚以告文王文王不敢占召太

子發命祝以幣告于宗廟羣神然後占之于明堂及發竝拜

吉夢季秋之甲子赤爵銜書及艷置于昌戶昌拜稽首受其

文要曰姬昌蒼帝子亡殷者紂王將畋史編卜之曰將大獲

非熊非羆天遣汝師以佐昌臣太祖師史疇為禹卜畋得臯

陶其兆如此王至于磻溪之水呂望釣于涯王下趨拜曰望

公七年今乃見光景于斯尚立變名答曰望釣得玉璜其文

要曰姬受命昌來提揆爾洛鈐報在齊尚出游見赤人自洛

出授尚書命曰召佐昌者子

潛夫論曰太妣有吉夢文王不敢康吉祀于羣神然後占于

明堂竝拜吉慶修發戒懼聞喜若憂故能成吉以有天下統

公夢見蓍收賜之士田自以為有吉因史嚚令國賀夢聞憂

而喜故能成凶以滅其封

季秋之月甲子赤爵銜丹書止于昌戶民踰山穿穴老幼相扶

歸者八十萬戶

按瑯環記南方有比翼鳥飛止飲啄不相分離雄曰野君雌曰觀諦總名曰常離言長相離著也此鳥能通宿命死而復生必在一處紂時集于長桐之上人以為雙頭鳥不祥及文武興始悟曰此竝興之瑞也

賁居子曰河不圖鳳不至孔子以為悲信帝王運數之不偶也顧河洛雖著有圖無文今周室丹書則灼灼七十八字夫倉頡初作書鬼且夜哭是天帝惡人之作書也天既惡人之書此七十八字必將如雲龍之篆幻不可識又誰為東哲而識寄事耶使在後世則以為魚腹書狐鳴書甚則為天書之誦而已矣古之世帝何其神而民何其愚易

惑也然以雁帛書燕足書推之則此丹書毋亦當時有幻術畸人繫書赤爵偶炫其奇而此爵偶集于昌之戶遂以為神聖之符未可知也又不然便佞臣皆能為之耳

有人雄起戴玉英鄭注云玉英寶物履赤矛注云赤矛瑞星名祈旦失

籥亾其金虎祈讀曰哲白也謂秦也且失籥東南紛紛注精起

紛紛動擾之貌注星昌光出軫已圖之鄭注云謂劉氏也謂

天鼓動玉弩發驚天下注云秦野有枉矢星形似弩賤一作類

出高將下賤類謂秦始皇也呂不韋之妻任身秦襄王納之生

賊起蜚卵生虎注云賊始卵金出軫握命孔符別金劉氏之

之命孔子制圖書秦失金鏡魚目入珠鄭注云金鏡喻明道

也亂真河圖子提期地流赤用藏龍吐珠鄭注云河圖子劉氏

寶物喻道也赤漢當用天之秘道故河龍吐珠也

按王命論初劉媪妊高祖而夢與神遇震電晦冥有龍蛇之怪及長而多靈有異于衆是以王武感物而折契呂公睹形而進女秦皇東游以厭其氣呂后望雲而知所處始受命則白蛇分西入關則五星聚故淮陰留侯謂之天授非人力也又按乾坤鑿度孔子曰推接位之術乾坤三上中下坤變初六復曰正陽在下為聖人故一聖二庸三君子四庸五聖六庸七小人八君子九小人十君子十一小人十二君子十三聖人十四庸人十五君子十六庸人十七聖人十八庸人十九小人二十君子二十一小人二十二君子二十三小人二十四君子二十五聖人二十六庸人二十七君子二十八庸

人二十九聖人三十庸人三十一小人三十二君子三十三小人三十四君子三十五小人三十六君子三十七聖人三十八庸人三十九君子四十小人四十一聖人四十二庸人孔子曰極至德之世不過此乾三十二世消坤三十六世消代聖人者仁繼之者庸人仁世淫庸世很又曰日者提不者殆易物之慎命不在雖有錄圖所當王必待日旁有氣提之五乃復可起也無此氣者且當止雖有錄圖第且勿順件者霸橫者距命歷握執并投者上契輔摘推失排細者咸名紀所錯中與用材毀直名件與橫與錯者三皆旁氣若投天投力之屬摘亡微也排細納也伯者齊桓晉文也距之若秦始皇者契輔推契而輔之也若夏太康之昆弟苴始毀者當任用英材之臣毀者八風之時與更用事終始相討期有從至有餘運有託除要有知衙合

三八以視璇璣審矣

接拒相錯之言也記除  
衙言命長短在改之也

古微書卷之三

古微書卷之四

明華容孫 毅著錄

尚書中候

謹按隋志河洛七經緯合八十一篇又有尚書中候洛罪  
級五行傳雜讖等書則中候屬讖不屬緯矣其說云孔子  
求尚書以其十八篇為中候以故漢世之學緯候竝稱考  
梁志八卷隋惟五卷今所見寥寥耳則握河摘洛倘皆其  
篇目之遺用繁與

天地開闢甲子冬至日月若懸塵五星若編珠

黃帝時天氣休通五行期化鳳皇巢阿閣謹于樹

黃帝巡洛龜書赤文成字象軒

黃帝軒提象配永循機軒轅黃帝名永長也循順也黃帝軒轅觀攝提之象配而行之以長為順斗機

為政焉天地休通五行期化休美也天地美氣應四時之變河出龍圖洛出龜書

曰威赤文綠字以授軒轅一本河龍圖出洛龜書感無曰威二字

黃帝時麒麟在囿鸞鳳來儀

賁居子曰按黃帝有土德之瑞黃龍地螾見也螾土精大

五六圍長十餘丈螾即蚓也河圖說徵篇黃帝起大螾見

帝王世紀黃帝時螾大如虹使在後世豈不為災怪之尤

而聖世輒以為瑞要之天亦何心也然則石虎時之芝草

數萬蒼麟十五吾未知其不為祥也

帝堯即政七十載景星出翼鳳皇止庭鄭注景大也朱草生郊翼朱鳥宿也

嘉禾孳連甘露潤液醴泉出山朱草可以染服者嘉美也書序曰唐叔得禾異畝同穎修

壇河雒仲月辛日昧明禮備榮光出河休氣四塞休美也榮光出美氣四塞

白雲起回風搖龍馬銜甲赤文綠色龍形象馬也赤爇怒之使

堯時龍馬銜甲赤文綠色臨壇上甲似龜背廣袤九尺一作尺圓音帶去也

理平上五色文有列星之分斗正之度帝王錄紀興亡之數

堯率羣臣東沈璧于洛退俟一作候至于下稷赤光起玄龜負圖


按握河紀作書出背甲赤文成字止壇稷一讀側

堯即政七十載稷為大司馬舜為大尉德政清平比隆伏羲鳳

皇巢于阿閣謹林下文同月

堯即政七十年鳳皇止于庭伯禹拜曰昔帝軒提象鳳皇巢阿

閣



堯祗德匪懈醴泉出文命盛德俊父在官醴泉出山醴甘也取名醴酒

文命咸得俊父在官則朱草生郊

堯沈璧于洛赤光起有靈龜負書出背甲赤文成字止壇 堯

沈璧于河黑龜出赤文題

按述異記堯為仁君一日十瑞宮中芻化為禾鳳皇止于庭

神龍見于宮沼懸草生堦宮禽五色鳥化白神木生蓮蓬蒲

生廚景星耀于天甘露降于地是謂十瑞 兔園策註堯時

三年耕餘一年之食謂之升平九年耕餘三年食謂之登平

二十年耕餘七年食謂之太平

舜沈璧于河榮光休至黃龍負卷舒圖出入壇畔

按淮南子堯之時十日竝出焦禾稼殺草木而民無所食契

糝鑿齒九嬰大風封豨修蛇皆為民害堯乃使羿誅鑿齒于

疇華之野殺九嬰于凶水之上激大風于青邱之澤上射十

日而下殺契糝斷修蛇于洞庭擒封豨于桑林萬民皆喜置

堯以為天子于是天下廣狹險易遠近始有道里舜之時共

工振滔洪水以薄空桑龍門未開呂梁未發江淮通流四海

溟滓民皆上邱陵赴樹木舜乃使禹疏三江五湖闢伊闕導

澶澗平通溝陸流注東海鴻水漏九州乾萬民皆寧其性是

以稱堯舜以為聖

賁居子曰堯之業多不傳者而羿之有功至等于大禹亦

所未聞且聞洪水為共工所播上古何多怪也不有絕怪

之業亦不足以徵絕聖之功

尚書中候

對山問月樓

初堯在位七十載矣見丹朱之不肖不足以嗣天下乃求賢以異于位至夢長人見而論治舜之潛德堯實知之于是疇咨于眾詢四岳明明揚側陋得諸服澤之陽

堯之長子監明早死不得立監明之子封于劉朱又不肖而弗獲嗣

按此堯之後所謂劉累者也夏后世之參龍而漢之所祖也

呂覽曰堯有子十人不與其子而授舜舜有子九人不與其子而授禹

伯禹在庶伯官稱號曰禹因為德謚庶庶人也四岳師舉薦之帝堯四岳四方諸侯也師眾也

薦進也五溝行也握括命不試爵授司空禹握括地象天已命之故不復試也伯禹稽首讓于益歸稽首拜頭至手益歸賢者堯臣歸讀為夔帝曰何斯

若真何不聽讓之辭斯此也若汝也此汝真其人出爾命圖元乃天爾汝也禹方讓隱之故曰出汝

魚身出口吾河精也天所命也括地象元讀曰祗祗是也乃天使汝治水非我也伯禹曰臣觀河河伯面長人首

伯禹拜辭禹將行故拜去禹理洪水觀于河見白面長人魚身出口吾河精也授禹河圖而還于淵

按吳越春秋禹傷父功不成循江沂河盡濟甄淮乃勞身焦思以行七年聞樂不聽過門不入冠挂不顧履遺不躡功未

及成愁然沈思乃案黃帝中經歷蓋聖人所記曰在于九山東南天柱號曰宛委赤帝左闕其巖之顛承以文玉覆以磐

石其書金簡青玉為字編以白銀皆琢其文禹乃東巡登衡

嶽血白馬以祭不幸所求禹乃登山仰天而嘯因夢見赤繡衣男子自稱元夷蒼水使者聞帝使文命于斯故來候之非厥歲月將告以期無爲戲吟故倚歌覆釜之山東顧謂禹曰欲得我山神書者齋于黃帝巖嶽之下三月庚子登山發石金簡之書存矣禹退又齋三月庚子登宛委山發金簡之書案金簡玉字得通水之理復返歸嶽乘四載以行川始于霍山廻集五嶽詩云信彼南山惟禹甸之遂巡行四瀆與益夔共謀行到名山大澤召其神而問之山川脈理金玉所有鳥獸昆蟲之類及八方之民俗國殊異域土地里數使益疏而記之故名之曰山海經

玄女占法禹問于風后曰吾聞黃帝有勝負之圖六甲陰陽之道今安在乎風后曰黃帝藏會稽之山下其坎深千丈廣千丈鎮以磐石致難得也禹北見六子問海口所出禹乃決江口鳴角會稽龍神爲見匱玉浮出禹乃開而視之中有天

下經十二卷禹未及持之其四卷飛上天禹不能得也其四卷復下陂池禹不能及也禹得中四卷開而視之 自古之功莫奇于禹矣則呼召神鬼鞭撻風霆理應有之不得爲誤

夏桀無道枉矢射山亾土崩  
桀爲無道地吐黃霧

按世紀湯禽桀于焦門放之歷山乃與妹嬉及嬖妾同舟浮海奔南巢之山

述異記曰夏桀宮中有女子化爲龍不可近俄而復爲婦人



甚麗而食人桀命為蛟妾告桀吉凶又曰桀時泰山山走石  
泣先儒說桀之將亾泰山三日泣今泰山山石遠望之若人  
泣蓋是也

玄鳥翔水遺卵娥簡易拾吞生契封商後崩水注云易疑浴娥簡在水中浴而  
吞卵生契後人當天又曰玄鳥翔水遺卵于流娥簡拾吞生契  
應嘉乃以水易為湯

封商

桀後十三世生主癸主癸之妃曰扶都見白氣貫月意感以乙  
日生湯號天乙

按乾坤鑿度孔子曰自成湯至帝乙帝乙湯之玄孫之孫也  
此帝乙即湯也殷錄質以生日為名順天性也玄孫之孫外  
絕恩矣同以一日生疏可同名湯以乙生嫁妹本天地正夫

婦夫婦正則王教興矣故曰易之帝乙為成湯書之帝乙六  
世王同名不害以明功

賁居子曰昔者桀名履癸而湯之稱亦云予小子履足以  
知古人之質矣

湯牽白狼握禹籙

天乙在亳諸鄰國強負歸德東觀乎一作洛習禮堯壇降三分

沈璧降下也以厚三分退立榮光不起黃魚雙躍出濟于壇魚者

無足翼言桀孤特無黨可伐也黃者土色土所黑烏以雒黑烏

以遏水今土歸湯雖祭猶為位告神故有壇紀之使隨魚亦止化為黑玉赤勒文曰玄精天乙受神福代桀

克三年天下悉合

按呂覽曰桀為無道天下顛恐于辛任威國人大崩湯欲令

伊尹往視曠夏恐其不信湯乃自射伊尹伊尹奔夏三年反報于亳曰桀迷于妹嬉好彼琬口不卹其眾民心積怨皆曰上天不卹夏民其卒湯與伊尹盟以示必滅夏伊尹又往視曠夏聽于妹嬉之言以告湯湯良車七十乘必死六千人以戊子戰于郟遂禽移大犧登自鳴條乃入巢門遂有夏民大悅親鄣如夏

按管子曰女華者桀之所愛也湯事之以千金曲逆者桀之所善也湯事之以千金內則有女華之陰外則有曲逆之陽陰陽之議合而得成其天子此湯之陰謀也

賁居子曰信斯言則伊尹與妹嬉比而亡夏固不謬矣陰謀之端乃開于聖人乎雖然非聖人亦不可以用陰謀

殷紂時十日雨土于亳紂竟滅國

紂末年雨石皆大如甕

按劉向別錄辛甲事紂七十五諫不聽而去召公與語賢之告文王親自迎之以為公卿封于長子

淮南子曰紂為無道左強在側太公竝世故武王之功立

太公釣于蟠溪夜夢北斗神告以伐紂之意

文王游蟠溪之水呂尚釣于崖王下拜曰乃今見光景于斯尚曰望釣得玉璜刻曰姬受命呂佐旌

按竹書紀年言王將畋史編卜之曰將大獲非熊非羆天遣大師以佐昌臣太祖史疇為禹卜畋得臯陶其兆類此王至于蟠溪之水呂尚釣于涯王下趨拜曰望公七年乃今見光

景于斯尚立變名答曰尚釣得玉璜其文要曰姬受命昌來  
提揆爾洛鈴報在齊尚出游見赤人自洛出授尚書命曰召  
佐昌者子

又說苑云呂望年七十釣于渭渚三日三夜魚無食者望即  
忿脫其衣冠上有農人者古之異人謂望曰子始復釣必細  
其綸芳其餌徐徐而投無令魚駭望如其言初下得鮒次得  
鯉刺魚腹得書書文曰呂望封于齊望知其異

周文王為西伯季秋之月甲子赤爵銜丹書入鄴鄙止于昌戶  
乃拜稽首受最最要言也曰姬昌蒼帝子亾殷者紂也

按竹書文王夢日月著其身又鸞鸞鳴于岐山孟春六旬五  
緯聚房後有鳳皇銜書游文王之都書又曰殷帝無道虐亂

天下星命已移不得復久靈祇遠離百神吹去五星聚房昭  
理四海

文王廢伯益考立發為太子王曰修我度遵德紀後恆稱太子  
發 文王廢考立發為太子

維王既誅崇侯虎諸侯貢萬民鬱一作喜 鄭注云王文王也 貢 貢國異物色也

文王曰我終之後恆稱太子 太子發以紂存三仁附即父位


不稱王文王得赤爵丹書改號以應天道未成而崩武王以 天誅未行謙不自稱故稱太子明統緒而未成王

子稱太子發明慎父以名卒考文王命武王我終之後恆稱 太子者明慎文王之命也

太子發以紂存三仁附即父位不稱王渡于盟津中流受文命

待天謀一作受天 命持謀白魚躍入王舟王俯取魚長三尺赤文有題

字題目下名授右有火自天止于王屋流為赤鳥五至以穀俱



來赤烏成文爵書之福一作有火自上覆于王屋一作復于下至于王屋

流為烏其色赤其聲魄

發行誅紂且引道也是七百年之基驗也

武王觀于河沈璧禮畢且退至于日旰榮光幕河青雲浮洛青龍臨壇銜元甲之圖吐之而去


按克殷解周車三百五十乘陳于牧野帝辛從武王使尚父與伯夫致師王既以虎賁戎車馳商師商師大敗商辛奔內登于廩臺之上屏遮而自燔于火武王乃手大白以麾諸侯諸侯畢拜遂捐之商庶百姓咸俟于郊羣賓僉進曰上天降休再拜稽首武王答拜先入適王所乃剋射之三發而後下車而擊之以輕呂斬之以黃鉞折懸諸大白適二女之所乃

既縊王又射之三發乃右擊之以輕呂斬之以玄鉞懸諸小白乃出場于厥軍又世俘解時甲子夕商王紂取天智玉口璫身厚以自焚凡厥有庶告焚玉四千五百武王乃俾于千人求之四千庶則銷天智玉五在火中不銷凡天智玉武王則寶與同凡武王俘商舊玉億有百萬

賁居子曰武王入殷三日五災不之忌而白魚赤烏顧獨為瑞然則災與瑞亦何足論

周成王舉堯舜之禮沈璧于河白雲起而青雲浮乃有蒼龍負圖臨河

成王觀于洛河沈璧禮畢王退俟至于日旰榮光併出幕河青雲浮洛一云榮光出河休氣四塞榮光即五色也嘉禾莖長五尺三十



五穗

周公旦卽攝七年鸞鳳見冀莢生青龍銜甲元龜背書 周公歸政于成王太平制禮鸞鳳見有元龜負圖出周公援筆以時文寫之 周公攝政七年制禮作樂成王觀于洛沈璧禮畢王退有元龜青純蒼光背甲刻書上躋于壇赤文成字周公寫之 按龜書所言自周公訖于秦漢盛衰之時麒麟游苑鳳皇翔庭成王援琴而歌曰鳳皇翔兮于紫庭予何德兮以感靈賴先王兮以恩澤臻于胥樂兮民以寧

維歲二月侯在東館鄭立注云維辭也 侯齊桓公館舍歎曰於戲仲父寡人聞古霸王封太山刻石紀號立顯象今寡人名爲何君管子曰衛困于狄案兵須滅乃存之仁不純爲霸君自昔古帝王功成道

洽符瑞出乃封泰山今比目之魚不至鳳皇不臻麒麟遯未可以封 齊桓公欲封禪謂管仲曰寡人日暮仲父年艾

按封與禪非一處管子曰昔無懷氏封泰山禪云云慮義封泰山禪云云神農封泰山禪云云炎帝封泰山禪云云黃帝封泰山禪亭亭顓頊封泰山禪云云帝嚳封泰山禪云云堯封泰山禪云云舜封泰山禪云云禹封泰山禪會稽湯封泰山禪云云周成王封泰山禪社首皆受命然後得封禪及至漢武帝登封泰山至于梁父而後禪肅然亦封與禪二處維天降紀秦伯出狩至于咸陽天震大雷有火流下化爲白雀銜籙丹書集于公車

自號之王霸姓有工工項字之側

古微書卷之四  
卯金刀帝出復禹之常

古微書卷之四

古微書卷之五

明華容孫 穀著錄

尚書五行傳

此篇伏生大傳引以傳洪範班固五行志亦祖之以徵五行  
行遯其來自緯書則大禹之文也緯書獨此為完簡耳

維王后元祀帝令大禹步于上帝步推也維時洪祀六沴用咎于

下是用知不畏而神之怒若六沴作見若是共禦帝用不差神  
則不怒五神乃降用章于下若六沴作見若不共禦六伐既侵  
六極其下禹乃共辟厥德受命休令爰用五事建用皇極長事  
一曰貌貌之不恭是為不肅厥咎狂厥罰常雨厥極惡時則有  
服妖有龜孽有雞禍有下體生于上之病青眚青祥維金沴木

次二事曰言言之不從是謂不乂厥咎僭厥罰常暘厥極憂時  
則有詩妖有介蟲之孽有犬禍有口舌之痾白眚白祥維木沴  
金次三事曰視視之不明是謂不愆厥咎茶緩也茶五行志作舒厥罰常  
燠厥極疾時則有草妖有倮蟲之孽有羊禍有目痾赤眚赤祥  
維水沴火次四事曰聽聽之不聰是謂不謀厥咎急厥罰常寒  
厥極貧時則有鼓妖有魚孽有豕禍有耳痾黑眚黑祥維火沴  
水次五事曰思心思心之不容是謂不聖厥咎霧厥罰常風厥  
極凶短折時則有脂液之妖有華孽有牛禍有心腹之痾黃眚  
黃祥金木水火沴土皇之不極是謂不建厥咎眊厥罰常陰厥  
極弱時則有射妖有龍蛇之孽有馬禍有下人伐上之痾日月  
亂行星辰逆行維五位復建辟厥沴曰二月三月維貌是司四

五月視六七月言八九月聽十一月思心十二月與正月皇  
極凡六沴之作歲月日之朝則后王受之歲月日之中則正卿  
受之歲月日之夕則庶民受之其三辰以次相將其受之星辰  
莫同是離逢非沴維鮮之功禦貌于喬忿言于訖衆視于忽似  
聽于怵攸思心于有尤皇極于宗始以其月從其禮祭之參乃  
從其事禮曰格祀格祀篇名也曰某也方祀曰播讀曰藩國率相行祀  
其祀也曰若爾神靈洪祀六沴是合無差無傾無有不正若民  
有不敬事則會批之六沴六事之機以垂示我民人無敢不敬  
事上下王祀

田獵不宿飲食不享出入不節奪民農時及有奸謀則木不曲  
直棄法律逐功臣殺太子以妾爲妻則火不炎上治宮室飾臺

樹內淫亂犯親戚侮父兄則稼穡不成好戰攻輕百姓飾城郭  
侵邊城則金不從革簡宗廟不禱祠廢祭祀逆天時則水不潤  
下

按管子幼官圖若因處虛守靜人物則皇五和時節君服黃  
色味甘味聽宮聲治和氣用五數飲于黃后之井以俛獸之  
火爨藏溫濡行毆養坦氣修通春行冬政肅行秋政雷行夏  
政則闔十二地氣發戒春事十二小卯出耕十二天氣下賜  
與十二義氣至修門閭十二清明發禁十二始卯合男女十  
二中卯十二下卯三卯同事八舉時節君服青色味酸味聽  
角聲治燥氣用八數飲于青后之井以羽獸之火爨藏不忍  
行毆養坦氣修通夏行春政風行冬政落重則雨雹行秋政

水十二小郢至德十二絕氣下下爵賞十二中郢賜與十二  
中絕收聚十二大暑至盡善十二中暑十二小暑終三暑同  
事七舉時節君服赤色味苦味聽羽聲治陽氣用七數飲于  
赤后之井以毛獸之火爨藏薄純行篤厚坦氣修通秋行夏  
政葉行春政華行冬政耗十二期風至戒秋事十二小卯薄  
百爵十二白露下收聚十二復理賜予十二始節賦事十二  
始卯合男女十二中卯十二下卯三卯同事九和時節君服  
白色味辛味聽商聲治濕氣用九數飲于白后之井以介蟲  
之火爨藏恭敬行搏銳坦氣修通冬行秋政霧行夏政雷行  
春政烝泄十二始寒盡刑十二小榆賜予十二中寒收聚十  
二中榆大收十二寒至靜十二大寒之陰十二大寒終三寒



同事六行時節君服黑色味鹹味聽徵聲治陰氣用六數飲于黑后之井以鱗獸之火爨藏慈厚行薄純坦氣修通

五行篇睹甲子木行御天子不賦不賜賞而大斬伐傷君危不殺太子危家人夫人死不然則長子死睹丙子火行御天

子敬行急政旱禮苗死民厲七十二日而畢睹戊子土行御天子修宮室築臺榭君危外築城郭臣死七十二日而畢睹

庚子金行御天子攻山擊石有兵作戰而敗士死喪執政七十二日而畢睹壬子水行御天子決塞動大水王后夫人薨

不然則羽卵者蝦毛胎者臏脰婦銷棄草木根本不美七十二日而畢也

又淮南天文訓甲子氣燥濁丙子氣燥陽戊子氣濕濁庚子

氣燥寒壬子氣清寒丙子干甲子蟄蟲早出故雷早行戊子干甲子胎天卯蝦鳥蟲多傷庚子干甲子有兵壬子干甲子

春有霜戊子干丙子霆庚子干丙子夷壬子干丙子雹甲子干丙子地動庚子干戊子五穀有殃壬子干戊子夏寒雨霜

甲子干戊子介蟲不為不為不成也丙子干戊子大旱菘封燬壬子干庚子大剛魚不為甲子干庚子草木再死再生丙子干

庚子草木復榮戊子干庚子歲或存或亾甲子干壬子冬乃不藏丙子干壬子星墜戊子干壬子蟄蟲冬出其鄉庚子干

壬子冬雷其鄉 又素問五帝篇岐伯曰木曰敷和火曰升明土曰備化金曰審平水曰靜順帝曰其不及柰何岐伯曰

木曰委和火曰伏明土曰卑監金曰從革水曰涸流帝曰太

過何謂岐伯曰木曰發生火曰赫曦土曰敦阜金曰堅成水曰流行

搜神記曰天有五氣萬物化成木清則仁火清則禮金清則義水清則智土清則信五氣盡純聖德備也木濁則弱火濁則淫金濁則暴水濁則貪土濁則頑五氣盡濁民之下也中土多聖人和氣所交也絕域多怪物異氣所產也

尚書璇璣鈴

或作載歷象之奧秘而術已亡傳矣

禹導江水決岷山治九貢注云貢功也治九州之功

禹開龍門導積石立圭出刻曰延喜玉王受德天賜佩禹功既成天出

立圭以賜之古者以德佩玉禹有治水功故天以佩立圭

湯受金符帝錄白狼銜鉤入殷朝注云鉤縛束之要明湯得天下之要也

述堯世放湯文

日旁氣白者為虹日旁赤青者為霓

太白經天水決江

流星色青赤名天雁其所墜處兵起天雁軍甲之精華也

其說皆見春秋緯

孔子求書得黃帝立孫帝魁之書迄于秦穆公凡三千二百四十篇斷遠取近定可以為世法者百二十篇以百二篇為尚書十八篇為中候

尚者上也書者如也上天垂文象布節度書也如天行也上一作天

垂文以布節度如天行也書務以天言之因而謂之書加上以尊之是謂

尚書篇題號

按尚書疏鄭玄云尚書上也尊而重之若天書然蓋玄依書緯以尚字是孔子所加故書贊曰孔子乃尊而命之曰尚書璇璣鈴云因而謂之書加尚以尊之

洞冥記云李充馮翊人自言三百歲從始皇發會稽望江海少好學為博士門徒萬人伏生時年十歲乃就充石壁中受

尚書以口傳授伏子四代之事略無遺脫伏子因而誦之常以繩十餘尋縛腰誦一徧一結十尋之繩皆繩結矣誦記之數萬徧且云食穀損人精慧故有遺失伏子今所傳百卷得其一矣堯舜二典所闕殊多帝聞神異乃聘徵充乃荷草畚負五嶽真形圖而至帝禮待之亦號負圖先生

尚書刑德放 一作攷

益為司馬禹為司徒禹為司空聖帝即位三公象三能矣 能古台字

禹長于地理水泉九州得括象圖故堯以為司空

火者陽也烏者有孝名武王卒成大業故烏瑞臻

東方青龍房位其規仁好生不賊其帝青表聖明行趨德

涿鹿者竿人頭也黃帝殺之涿鹿之野身首異處故別葬豈竿

其首于涿鹿地乎 涿鹿者竿人頭也黥者馬黥竿人面也臙

者脫去人之臙也臙罰之屬五百象七精 官者女子淫亂執

置官中不得出也割者丈夫淫割其勢

劓象七政日月五星應政變易臙象七精宿變易即氣色生也

墨象斗華

尚書運期授

白帝之治六十四世其亡也枉矢射參

黑帝亡二日竝出

桀失玉鏡用其噬虎

注云玉鏡謂清明之道噬虎喻暴虐也

房四表之道

宋均注云四星間有三道日月五星所從出入也

按古今占日月行房三道其政太平行上道昇平行中道霸世行下道可視瞻之短于歷舊景為行上道與歷合為行中道長于舊景為行下道

尚書帝驗期

西王母于太荒之國得益地圖慕舜德遠來獻之  
王母之國在西荒凡得道授書者皆朝王母于崑崙之闕

中候握河紀

世紀堯與羣臣沈璧于河乃為握河紀今中候也告禪後  
二年刻璧為書沈洛今中候運衡篇也所授之圖書今握  
河紀也

堯卽政十七年仲月甲日至于稷沈璧于河青雲起回風搖落  
龍馬銜圖赤文綠色注云龍形象馬故云馬圖自河而出臨壇而止吐甲廻  
遶甲似龜廣九尺有文言虞夏商周秦漢之事帝乃寫其文藏  
之東序

堯卽政七十年授河圖帝立壇磬折西向禹進迎舜契陪位稷  
辨護辨護者供時用相禮儀也堯曰嗟朕無德欽奉丕圖賜爾二三子斯時  
稷契臯陶皆賜姓號又沈璧于洛赤光起有靈龜負書出背甲

赤文成字止壇堯曰皇道帝德非朕所事一作專

中候考河命

若稽古帝舜曰重華欽翼皇象注云翼奉象歷也言舜曰朕惟

不艾冀茲孚著百獸率舞鳳皇司晨注云如舜至于下稷榮光

休至稷讀曰側下之側日西黃龍負卷舒圖出水壇畔赤文綠

錯錯分也文而以

按乾坤鑿度孔子曰天之將降嘉瑞應河水清三日青四日

青變為赤赤變為黑黑變為黃各各三日河中水安井天乃

清明圖乃見見必南向仰天言見三日以三日見六日以六

日見九日以九日見十二日以十二日見十五日以十五日

見皆言其餘日



中候摘洛戒

若稽古周公旦欽惟皇天順踐祚卽攝七年鸞鳳見冀莢生青

龍銜甲立龍背書以上一本無以

周公踐祚理政與天合志萬序咸得休氣充塞藩侯陪位羣公

皆就立如舜周公差應差應邪錯在後聖人在神位故近之至于日昃榮光汨河

汨覆也青雲浮至青龍仰立甲臨壇上濟止圖滯青龍靈威仰之使立甲所以裹

圖周公視三公視聖人故先其文言周世之事五百之戒與秦

漢事

中候雜篇

中候書佚而類書所引中候篇目猥多然章句已不倫矣  
遇一語二語輒為羅之

中候運行一作衡

帝堯刻璧率羣臣東沈于雒書天子臣放勛德薄施行不元元善也

中候洛予命

湯觀于洛沈璧而黑龜與之書黃魚雙躍

中候摘洛戒

剡者配姬以放賢山崩水潰納小人家伯罔主異載賓賓一作震剡指  
也艷妻也

中候義明

祠五九禮闕郵

宋注闕止也郵過也言五帝後祠三王之世其治各九百歲當以禮止過也

中候敕省圖

德合五帝坐星者稱帝

中候稷起

蒼耀稷生感跡昌

中候準讖哲

仲父年艾誰將逮政

注云七十日艾者言誰將逮政

桓公欲封禪管仲曰昔聖王功成道洽符出乃封泰山今比目

之魚不至鳳皇不臻麒麟遁未可以封


附 洪範緯

日中行道移節應期德厚受福重華畱之

古微書

卷五

古



古微書卷之五

文化甲戌

